

諍言集

傷緬甸政變

鑼鼓干霄起，黃沙蔽日昏。有靈天亦泣，無主恨難吞。將相猶酣戰，英雄帶血痕。槍聲來四面，更得幾人存？

詠湯德章

瀛洲多虎豹，民主鎖金湯。黑地臨斜日，青天轉薄涼。願傾方寸血，換取自由鄉。敢作違時客，將身鑄德章。

詠鄭南榕

誓起蒼生與國謀，未彰民意未銷憂。當須姓氏銘燕石，豈復衣冠作楚囚。七十日中爭獨立，三千里外論難休。投身願化衝天火，燒卻人間不自由。

答友人問貧

何妨壁立相如家，愛把簞瓢掬晚霞。孔孟潛心斯有道，風騷滿腹更無邪。清齋好種陶潛菊，暇日來烹陸羽茶。衣染芸香書在架，天光雲影是生涯。

2021 跨年

前途九曲風雲裡，季子如何不著塵。流落悲因懷白璧，往來銷盡是青春。愁隨蔓草無端遠，物似煙花特地新。只有明朝經歲客，依然萬里未歸人。

客中二首

青春易減抑難加，不限流光換歲華。往復亂雲看世勢，浮沉碧水計生涯。誰堪極目唯芳草，豈獨傷心是落花。休向子規啼血處，由來久客便無家。

但著蘇裘作上游，黃花轉眼又驚秋。何如客路難行路，未放清流向濁流。一種飄遊真大夢，多年身世等浮漚。紅塵詎得通天索，只繫金烏不繫舟。

晚秋書懷

秋風吹落葉，無根只自凋。客子青衫破，平生如蓬飄。綾書題大字，澄心屬風騷。蘭蓀有同調，手筆拔俗標。想當策高足，志在九雲霄。當時別父母，毅然向北漂。千里側身去，去路一迢迢。舊都繁華甚，世事亂鳴蜩。大戶多嚙啗，華轂競囂囂。冷眼對路塵，未肯先折腰。違時當瘦骨，旅食帶涼飆。誰憐拙生理，故舊久相拋。能文徒已

矣，貧病命不遭。楚山終抱璞，酸言百鍊刀。時人生白眼，對眾懶解嘲。青雲猶未就，日月不相饒。思親意轉慚，萬慮不相銷。登樓有所思，身世一羽毛。狐鼠各有穴，燕雀豈無巢？病葉飛零亂，秋意何蕭條。獨坐黃昏後，無處解寂寥。

破剝

破剝翠煙中，曾經古梵宮。蓮華浮水白，瑪瑙映階紅。閣鎖相依網，帷開不盡風。多情山徑草，一歲一新叢。

代悲新住民

油麻栽道旁，歲暮任風翻。菜籽無根柢，好去逐雲端。人間皆可往，無乃向臺灣。昔我未嫁時，家貧尚能安。仲介至越南，勸我適大員：「父母苦無食，弟妹衣不完。大員奶蜜地，到處石家園。道上保時捷，華廈高入天。寶島男子多，至此覓良緣。一人渡海去，十口可飽餐。」將身託仲介，嫁我天一邊。青春何所貴？不過十萬錢！夫家竟不富，用度需操煩。朝插青秧苗，午顧大蒜田。暮剝蚵仔殼，直至夜闌珊。返家猶代工，不得一日閑。辛苦為生計，手足俱瘡癢。買我為新婦，何用談人權？翁姑視如婢，言行俱尖酸，夫婿語不通，動輒疾連拳。旁人皆白眼，出入備熬煎。他鄉萬事隔，舉目渾無援。長風萬里來，吹衣更翩翩。油麻無人管，開落年復年。看花滿眼淚，更與誰人言？

八月廿七雨中送友

瘦葉飄搖盡，乾坤晦色濃。何期風雨會，自是夢魂通。別緒三千丈，滄波十萬重。開帆應更緩，海上有蛟龍。

大家犬

華榱璧璫列珊瑚，大家園林賽金谷。園中有犬似其主，主人蓄之黃金屋。毛香身淨走脫兔，玉鐺銀飾五彩服。黃耳黃耳一何慧，眼分青白知貴俗。爪牙夾風勝螭虎，長驅踵決親與族。皂蓋朱輪飛路塵，繞膝搖尾善低伏。君不見良犬禦賤不禦富，世情懂擾但逐祿。我輩由來與時異，見棄合當餅無粟。牆內有犬厭腥膻，牆外有人食不足！

高山花

地闊囂氛遠，山高顯氣清。早花生寂寞，剪影瘦分明。皓露猶垂葉，飄風未折莖。空林開復落，人世不知名。

勸竹

小園風光已含韶，楊柳堆煙花如織。有竹當風無人問，伶仃獨立中庭北。遊人但愛花與柳，惟我憐君孤且直。竹也竹也聽我語，春風易逝柳無力。雲霞花面豈常駐？一朝臨寒先改色。何如年年萋以綠，霜候雨幕侵不得！

蜚蠊怒

堂中新裝修，掃灑正時節。將用滴滴梯，忽有聲咕咕。蜚蠊振翅來，對面相呼喝：「我輩犯何罪，未審先見殺！」執藥相應答：「形貌具醜劣。今若存爾輩，使我蒙不潔。」蜚蠊一何怒，反唇更相訐：「昔爾未來時，自然樂生活。千山霞作綺，一江花如雪。天地生人後，乾坤轉磨滅。拔山鋪柏油，斲木起紅埕。江河空遺臭，穢汙流未徹。聞道象牙好，千象牙盡拔。南海翡翠艷，去羽籠中閉。燕窩能滋補，覆巢供口舌。魚翅味殊異，鯊鰭競相割。美物多遭難，我亦災不絕。親朋此中居，千年傳瓜瓞。爾來佔我屋，逐我屈幽穴。出入不見光，到處食殘屑。復又驅我族，陷阱即施設。父母死鞋下，慘淒軀幹裂。妻兒毒霧裡，心肝斷九截。兄姐為全命，竄逃未及別。其如豪強何？可恨力難奪！衝天半是冤，塗地無非血。爾稱萬物靈，義理漫相說。但為一己故，美醜盡摧折。敢問讀書人，更誰謂巨孽？」聞言長怍色，惘然舌百結。回神蜚蠊去，長夜猶未歇。